

四庫全書

集部

欽定四庫全書

集部

鬱洲遺稿卷二

詳校官中書臣瞿照

中書臣劉源溥覆勘

總校官原任臣王燕緒

校對官學正臣湯垣

謄錄監生臣陸昂

欽定四庫全書

集部六

鬱洲遺藁

別集類五

明

提要

臣等謹案鬱洲遺藁八卷明梁儲撰儲字叔厚號厚齋晚號鬱洲廣東順德人成化戊戌進士官至華蓋殿大學士謚文康事迹具明史本傳是集為其子次挹所編初名鬱洲集香山黃佐為之序後其孫孜官中書舍人從

內閣錄其奏疏彙入前彙而并刻之釐為十卷名曰鬱洲遺藁即此本也儲厯事三朝當武宗末造盤游無度羣小弄權正机隍不寧之時乃能與楊廷和等協心輔政斷斷焉屢以口舌相爭集中所載奏疏如武宗自封鎮國公則上疏力阻許給秦王關中間因為牧地則於草勅時為危言以動聽事遂得寢又請回鑾疏至八九上無非惓惓忠愛之忱雖

辭乏華腴而義存規諫亦可見其大節之無愧矣黃佐嘗稱其生平著作多不存藁故集中詩文寥寥無幾體格亦不甚高蓋非其注意之所在云乾隆四十三年六月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

鬱洲遺稿卷一

明 梁儲 撰

奏疏

乞致仕疏

臣梁儲謹奏為自劾不職乞恩休致事臣才微德薄素多疾病今年踰六十病日益增而久叨重位瘵曠無補其為可去無可疑者顧舊歲二三月及十一月間曾三

次自劾求退俱未蒙聖恩俞允今歲正月間又同大學士楊廷和等以災異之故具疏乞休亦未蒙俞允之旨臣伏自惟念尤有不勝其惶懼者請更以臣宜去之義重為皇上陳之臣聞君父之恩無窮而大臣之分有限為大臣者若昧其止足之戒冥行而不自顧則折足覆餗之凶咎隨之矣況今內閣三臣之中惟臣年最老病最多才最短輔導最無狀欲求因災異策免以警戒于有位宜無有先於臣者皇上縱存念舊物未遽捐棄然

其如臣之私願未遂何哉如天下之公論未協何哉臣之此情實尤懇切伏望皇上特垂睿察即日容臣以禮致仕別選賢能以充任使庶幾盡脩德弭災之實以回天意而臣於林下亦得以終被無疆之澤矣臣無任待罪祈恩激切懇請之至為此具本親齎謹具奏聞伏候勅旨正德九年二月初四日奉聖旨卿職司密勿勞勩著稱正方倚任才識老成豈可引年輒求休致所辭不允吏部知道

問安疏

臣梁儲等謹題二十九日早司禮監太監蕭敬等節該
傳奉聖旨朕躬偶爾違和暫免朝參數日臣等聞命下
情不勝瞻戀伏望聖明慎起居節飲食頤養天和茂膺
洪福以慰臣民之望謹具題問安正德十年四月三十
日

請停工疏

臣梁儲等謹題前日欽蒙發下工部一本為修理殿宇

添蓋房屋等事大意以為見今營建乾清坤寧二宮工程浩大財力匱乏將內官監所奏修理太素殿及天鵝房船塢等項房屋工程停止臣等已擬旨進呈未蒙批出中心惶惑不知所為竊惟陛下宮寢未建中外臣工日夕不安工部職掌工作已經會計查處派徵差官分投前去各處採取大木燒造磚瓦但值民窮財盡之時猝難辦集非惟工部以為憂臣等皆切憂之恨無方略以佐經費今大工方興若將前項不急之工一併整理

則合用錢糧將何取給取之官則官無蓄積取之民則民已困敝況此役一興大工未免為其妨誤夫以可緩之役而妨當急之務深為未便該部計無所出利害切身事勢窘迫言非得已伏乞聖明乾斷速賜批行將前項殿宇房屋工程暫且停止待後大工就緒民力稍舒之日該衙門另行具奏定奪臣等不勝懇悃之至謹題請旨正德十年閏四月日

勸止臨幸疏

臣梁儲等謹題日者竊聞聖駕自西安門出外經宿而回不知臨幸何所臣等初聞未敢遽信既而道路相傳衆口藉藉使臣等心志憂惶神魂飛越輟轉思惟莫知所處竊惟天子出入必脩法駕必傳警蹕衛士環列百官扈從所以嚴至尊之分而防意外之虞也且如南郊大祀不過一宿虎賁之旅鷹揚之將周旋左右而直廬拱衛官軍萬餘警柝之聲夜以達旦至於皇城各門又令勛戚重臣守把祖宗之法至為詳脩今聖駕之出不

知環衛者何人居守者何官文武羣臣茫不與聞若徒無故輕身而出率意而往擾擾塵埃中萬一車馬驚蹙之虞奸盜竊發之變出於意料之所不及未知何以脩之雖然天神協相決無是事而臣等私憂過計實切寒心夫千金之子尚不肯垂堂而坐陛下一身乃宗廟社稷之主縱不為身惜獨不為宗廟社稷計乎仰惟聖性高明天資英邁洞燭天下之事機已非一日必不輕易舉動竊恐左右羣小貢諛希寵之徒倡引事端蠱惑聰

明陛下偶未深思而遽從之上累聖德下駭人心凡此
導引之人其罪殆不容誅但事在秘密非臣所知不敢
妄有指議伏望陛下念祖宗付託之重體臣民瞻戴之
情自今以後端拱穆清以保威重節宣勞逸以頤天和
嚴內外出入之防正堂陛尊卑之分戒非時之宴遊屏
無益之玩好仍乞查究導引出外之人置之於法以彰
剛斷之德以解臣民之疑宗社幸甚天下幸甚臣等備
員輔導平時既不能調護聖躬弼亮治理茲有所聞若

復忌避不言則欺君負國之罪死不足贖儻以為所聞
不的干冒天威明示黜罰不敢辭避臣等不勝忠愛懇
悃惶懇迫切之至謹具題知正德十年六月十六日

議邊務疏

臣梁儲等謹題為邊務事近因陝西地方節報邊寇聲
息特命太監張忠監督軍務帶領參將宋贊湛臣部下
官軍三千員名從北路去都督張洪掛印充總兵官帶
領京營官軍五百員名遼東官軍三千員名從南路去

都御史陳天祥提督軍務各調度陝西將官殺賊臣等
仰見皇上憫念關陝軍民重被荼毒故欲大彰天討以
靖地方古帝王安夏攘夷伐罪救民之心不是過也竊
惟陝西自去冬北敵入套今年由夏徂秋不次入境寇
剽各該總制鎮巡等官不能設策防禦致今八月以來
擁衆深入腹裏平涼鳳翔地方又侵犯延綏米脂綏德
等處大肆擄剽我軍曾無斬獲之功上塵聖慮遠勞王
師固非得已但敵人故智入套則西寇關陝過河則東

窺宣大今在套已及一年入掠不止一次飽其所欲滿載而歸腹裏地方孳畜已空無可復掠此後水冷草枯似難再入冬深凍堅必將蹈冰過河為大同宣府偏頭關等處之患及照陝西守臣初未嘗請兵該部原擬設主將一員帶領京營官軍五百員名限十日內起程星馳前去調度征勦本欲救陝西目前之急已蒙聖明俞允深合事宜今張洪受命月餘機會已過若復統領重兵紆回數千里以至陝西冬令已深河水已合腹裏恐

彭洲遺稿

之兵以應之乎伏望聖明乾斷合無令張忠張洪俱從
宣府大同前去一面差人馳往延綏探訪如果敵兵尚
在陝西地方搶掠鎮巡官飛報速即前進督同各鎮將
官會兵征剿若潛伏套內勢將過河前項軍馬且在宣
大駐劄休息聽調待其過河各官應否改命提督宣大
山西或敵衆北遁歸巢相應班師俱聽兵部議奏定奪
惟復照依兵部原擬先令張洪帶領京營官軍五百從
山西石州地方過河張忠亦先帶令奏討團營官軍五

百員名與陳天祥俱往赴延綏相機行事其遼東并宋
賈等部下官軍俱暫在宣府操候本處有警可以調用
若陝西果有緊急聲息方纔催調前去庶免徒勞人馬
亦不虛費供給況陝西延寧二鎮兵馬俱素稱勇銳而
大同遊奇等兵又見在彼處得人調度足可成功何至
遠勞遼東之兵以示弱於敵人乎臣等又思得宣大二
鎮及山西偏頭關等處節被敵人寇擾地方凋殘士馬
疲敝而宣府軍威屢挫失事最多比之他鎮尤為狼狽

切近京師與密雲古北口一帶唇齒相連尤宜保護伏願皇上申敕三鎮守臣及時修飭牆塹操練軍馬禁剝削之弊以養兵力時糧賞之頒以作士氣一應防邊禦敵事宜預為區處賊來有以待之使地方不至重貽患害以貽九重北顧之憂臣等備員輔導知而不言是為欺君畧陳所見如此伏惟聖明裁擇謹題請旨正德十年十月初九日

請明敕遣中官疏

臣梁儲等謹題為傳奉事該兵部揭帖開稱正德十年十一月十三日該司禮監太監溫祥傳奉聖旨司設監太監劉允着他前去四川等處公幹寫勅與他該衙門知道欽此欽遵傳奉到部合具揭帖赴翰林院請寫勅書等因照得內外官員欽奉勅內必須脩開所行事務今太監劉允前去四川未知幹理何事該部揭帖內不見開載臣等無憑撰寫仰惟聖明在上事遵成法茲欲勅遣近臣於數千里之外公幹必是事情重大伏乞明

諭臣等知之庶使所撰勅文有所憑據謹題請旨正德
十年十一月十七日

修書籍疏

臣梁儲等謹題為修理書籍事照得內閣并東閣所藏
書籍年歲既久殘缺頗多必須專委官員用心管理方
可次第修補今推得見在誥勅房辦事中書舍人胡頤
序班劉偉俱堪委用合無令胡頤仍舊職劉偉改典籍
與同原管主事李繼先專一管理前項書籍臣等仍督

令逐一查對要見某書原數若干見在完全者若干殘缺應修補者若干待查明之日再行奏請裁處緣係修理書籍事理未敢擅便謹題請旨正德十年十一月日次日奉聖旨是吏部知道

留遠人疏

臣梁儲等謹題暫留遠人教習以便審譯事據提督四夷館太常寺卿沈冬魁等呈該回回館教習主簿王祥等呈竊照本館專一譯寫回回字凡遇海中諸國如占

欽定四庫全書

朝鮮遺稿
卷一

城暹羅等處進貢來文亦附本館帶譯但各國土語土
字與回回不同審譯之際全憑通事講說及至降勅回
賜等項俱用回回字今次有暹羅國王差人來京進貢
金葉表文無人識認節次審譯不便及查得近年八百
大甸等處夷字失傳該內閣具題暫留差來頭目藍者
哥在館教習成效合無比照藍者哥事例於暹羅國來
夷人內選留一二名在館并選各館官下世業子弟數
名送館令其教習待有成之日將本夷照例送回本王

等因實為便益據此臣等看得習譯夷字以通朝貢係是重事今暹羅夷字委的缺人教習相應處置合無著禮部行令大通事并主簿王祥等將本國差來通曉夷字人再加審譯暫留一二在館教習待教有成效奏請照例送回庶日後審譯不致差誤緣係暫留遠人教習事理未敢擅便謹題請旨

請重大祀疏

臣梁儲等謹題為大祀事照得本年正月十三日皇上

大祀天地於南郊初十日百官聽受誓戒十二日聖駕
晨出至壇視具省牲乃御齋宮百官叩頭至晚分獻并
執事等項官生人等各於西大門外候開進入是夜子
時上恭詣大祀殿行禮禮畢還齋宮百官先回於承天
門候駕隨至奉天殿慶成稱賀此祖宗舊制朝廷至重
至大之禮盖人君至尊無對所當敬畏者惟天地此而
不用其誠何所復用其誠仰惟皇上嗣極以來祇畏天
顯率由舊章故未嘗有所違越一念之誠自能上通於

天羣臣將順之不暇夫復何言但比歲駕出鑾回或至
暮夜竊恐俎豆陳設不能蠲潔禮樂儀容不能整脩無
以稱聖明敬天之意且扈從供事數十萬人若至暮夜
則警蹕不嚴兵衛不肅百官失趨蹕之容班行無等級
之分甲馬或交馳於輦道羣衆或喧呼於御街非所以
壯臣民之觀瞻而啓四夷之尊戴也況塵埃昏暗之中
慮有不測禁門出入之際尤難闕防雖聖德格天百神
訶護萬無他虞而臣子之私憂過計不能不拳拳於此

也伏願皇上深思大祀之重慎惜至聖之體駕出迴鑾
悉遵故事俱在清晨使禮官得以周旋百僚得展誠敬
則天地歆鑒臣民懽悅和氣致祥實宗社萬萬年無疆
之休也臣等備員輔導不忍緘默謹具題知伏惟聖明
留意正德十一年正月初八日

請定大本疏

臣梁儲等謹題為定大本以繫人心事仰惟陛下嗣登
大寶十有二年敬天法祖愛民任賢謹兵戎之練以制

邊陲奮威刑之施以懲奸宄如正德五年以前賊臣擅
權毒流天下陛下一變色而大奸伏誅矣正德八年以前
羣盜稱亂遠近騷然陛下一指示而地方底寧矣今萬
姓仰德四夷向風臣等承望清光之不暇夫復何言顧
事有至大至急中外臣民同懷隱憂而不能一日釋然
者不敢不昧死言之陛下儲嗣未建宮坊尚虛比年以
來兩京大小羣臣屢以為請雖蒙涵納未見施行臣等
備員輔導守獨未敢言及者蓋以祖宗功德深厚慶祉延

綿陛下以鼎盛之年綏方至之福螽斯麟趾之兆行將見之未足為晚荏苒因循又復數歲而椒寢之慶未徵甲觀之祥未著臣民憂惶日甚一日臣等若復忌避不言則是負君悞國罪不容誅矣竊惟自古帝王既續大業即建儲貳上以承乎宗廟社稷而下以繫屬天下之心絕覬覦之念塞禍亂之源實在乎此其或儲嗣未育則必求同姓親賢以為之輔詩曰宗子維城故儲貳者天下之根本而同姓者朝廷之屏翰也今大夫士庶叨

一命之榮席百金之產如未有嗣必圖所以繼其後陛下富有四海之廣貴膺萬乘之尊而左右無屬籍之親京師無藩屏之託比者妖言不軌之徒徃徃藉以為詞雖旋即事露伏法而意外之虞不可不慮此臣等之心所以食不下咽而寢不貼席也然此事重大秘密臣下固當言之若夫慎而行之則在君上非人臣所敢與聞伏願陛下斷自聖衷祇循成憲遠念前朝已行之故事近採兩京臣下之進言宜早擇宗藩近屬之賢者二三

人召至京師置諸左右使之供問安視膳之禮代奉先
晨謁之勞簡謹厚之人與之居命儒宿之臣以導之學
使萬方臣庶知朝廷有屬籍之親有藩維之重憂疑之
心自此而釋覬覦之姦無自而萌且聖德格天多男有
頌必當不遠待皇子誕育主鬯有人然後優其禮遇使
各歸藩邸事體無嫌理義俱順如此則天地豫悅百神
歆饗宗廟社稷並受其福況百官兆民有不歡呼蹈舞
於光天化日之下者乎陛下所以延萬年統緒之傳而

迂四海平康之治者莫急於此矣臣等一念忠悃發自
肺肝觸犯雷霆罪當萬死伏惟聖明留神詳察正德十
一年三月日

請罷遣中官疏

臣梁儲等謹題為傳奉事
先該兵部手本開稱司禮監
太監溫祥傳奉聖旨司設監
太監劉允着他前去四川
等處公幹寫勅與他該衙門
知道欽此欽遵臣等看得
內外官員欽奉勅內必須
備開所行事務今太監劉允

前去四川未知幹理何事不見開載無憑撰寫已經具
題未蒙明示近該禮部手本開稱司禮監太監秦文傳
奉聖旨司設監太監劉允看照永樂宣德年差鄧成侯
顯等事例去烏思藏地方齎送番供等物寫勅與他該
衙門知道欽此欽遵傳奉到部開具手本赴翰林院請
寫勅書等因續於戶部覆本內看得太監劉允奏要帶
太監等官劉宗等八員錦衣等衛官舍指揮同知韋祿
等一百三十三員名應付廩給口糧馬匹車輛馬快船

隻該用過番物件欲令四川鎮巡三司聽其便宜措置
及選差驍勇官二員量帶官軍計程支脩糧料直抵彼
處往回護送又稱撫犒各夷須用食茶金帛絹布等物
無從措辦乞將長蘆運司見鹽一萬引兩淮運司見在
正課鹽六萬引給與變賣應用等事情乞賜勅內開載
等因荷蒙俞允臣等愚昧心有未安不敢不言竊惟西
番本夷狄之教邪妄不經古先聖王之世未聞有此顧
其說流入中國浸淫已久未能遽革永樂宣德年間雖

嘗有遣使之舉我祖宗之意以天下初定特藉之以開導愚迷鎮服戎狄非真信其教而崇奉之也承平之後累朝列聖止是因其年例遣人朝貢厚加賞賚答其勤劬未嘗輕辱命使遠涉夷境陛下今遣近侍內臣前去齎送番供朝野聞之相顧駭愕以為堯舜在上不應有此輕舉而太監劉允奏討塩引數萬動撥馬快船至於百隻又欲聽其便宜處置錢物若撥官軍護送等項於法例俱不相應盖開中塩引本為供邊今外患未寧三

邊糧草缺乏帑藏空虛緩急接濟惟此一策且各運司
該年鹽課俱開中盡絕若許其帶鹽不過收買私鹽發
賣射利乘機夾帶之弊不知幾何鹽法為之大壞邊方
何以仰給況京儲歲運與營建大木併在裏河議者猶
恐不能疏通若又添此等鹽船往來其間挾勢騷擾不
止地方受害而糧運大木二事被阻滯妨碍又照四川
地方大盜初息民困未蘇所奏便宜措置錢物在官已
無積蓄未免科派軍民民窮盜起將來事變殆不可測

且自天全招討司出境涉歷數萬里之程動經歲年方
得到烏思藏地方今帶去官軍人役數多沿途俱是化
外非有驛傳供給人馬芻糧俱要馱載而行所費鉅萬
難以逆料途間倘有不給不知何以為處又聞番地多
與黃毛邊裔相隣時出剽掠為患使臣所至萬一被其
突出有所傷害虧中國之體納外夷之侮此事理所有
不可不慮夫以無益之事而妨至要之事且貽意外之
虞舉朝皆知其不可此臣等不能已於言也緣劉允受

命遠出番境利害切身亦非得已臣等深見事勢之難
前項勅書委實不敢撰寫伏望皇上慎重國體憫恤人
窮收回成命不必差官番貢等物止照節年事例就令
彼處朝貢使臣齎回則禮意不失事體無碍物議不興
外患不作而聖德益光治功無累矣臣等備員輔導此
等事情心知不可若隱默不言他日陛下追悔前事之
失責臣等不能匡正其罪莫逃謹昧死言之伏惟留神
省覽臣民幸甚天下幸甚臣等不勝待罪俟命之至謹

題請旨正德十一年三月日

災異求免疏

臣梁儲等謹奏為不職妨賢致生災異乞賜罷黜以答天譴事臣等章句腐儒才非經濟誤蒙皇上簡入內閣與聞幾政今官躋一品位列三孤文臣恩遇殆罕倫比臣等其敢不勉圖報稱顧嘗切自思之以學術則不足以代王言以謀猷則不足以裨國論徒冒輔導之名全無啓沃之效況國家之大本未立中外之疵政尤多有

司之征歛益繁生民之困苦已極凡若此類未易枚舉
臣等雖知之而不能言或言之而不盡跡其不職之罪
決當罷黜無疑矣又況冬無瑞雪春有風霾小雨初零
隨即晴霽祈請雖切甘霖未降今二麥已枯五穀未種
災害疊見邊報屢至若使雨再愆期年更荒歉則將來
可憂之禍殆有不可勝言者伏望皇上深思天戒裁以
大義即將臣等削去官職罷歸田里別選天下才賢入
閣辦事庶幾猶有回天之望天下之事必將尚有可為

者若復顧惜優容不令臣等亟去直待事變已極然後
改圖用賢則不惟無益於事而臣等之獲罪於公論益
又深矣臣等迫切陳詞實由衷曲聖明在上必祈垂察
而曲成之蓋臣等一退之後既可少逭乎罪愆而羣賢
彙進之初必有以大毗乎新政是不惟臣等之幸而亦
天下之大幸也臣等下情無任激切屏營祈望之至為
此具本親齋謹具奏聞伏候勅旨正德十一年四月初
八日具官云云初九日奉聖旨上天示戒正宜交修卿

等職居輔導調元贊化以裨至治豈可自引求退所辭
不允着安心辦事該衙門知道欽此

請補缺官疏

臣梁儲等謹題為缺官事照得詹事府翰林院左右春
坊司經局等衙門各有額設官員俱以文字講讀考試
等事為職業累朝以來或以詹事少詹事庶子諭德等
官兼翰林院官或以學士侍讀學士等官兼春坊官近
年各該官員多有陞任及事故等項去訖見今詹事止

有尚書蔣冕掌管印信翰林院堂上止有侍讀學士顧清一人春坊司經局止有左右中允劉龍李廷相二人各掌管印信況今年順天應天二府鄉試及明年禮部會試又例該用學士庶子等官充考試官誠恐差用不敷合無看吏部查照先年事例將前項衙門量擬應補員數并開具年深官員職名上請陞用以便差遣緣係缺官事理臣等未敢擅便謹題請旨正德十一年四月日

議邊務疏

臣梁儲等謹題為邊務事近日北敵糾衆深入白羊口等地方搶掠今青邊等口又報大勢敵兵入境皇上大彰天討已命太監張忠監督軍務都督劉暉掛印充總兵官侍郎丁鳳提督軍務都督桂勇都指揮賈鑑充左右參將各統領京營遼東官軍調度各鎮守臣征勦天威所臨敵兵聞風震懾若不遠遁必然駢首就戮獻俘奏凱刻日可期但兵事甚重難以逆料地方安危在此

金史卷一百一十五
卷一
一舉臣等任忝股肱一得之愚不敢緘默謹條陳如左
伏乞聖明省覽俯賜施行謹題請旨

一師克在和宜令張忠丁鳳劉暉等務以朝廷付託為
重凡軍中一應大小事務湏要同心協慮會議停當而
行至於用兵機宜還用責成劉暉桂勇等聽其進止庶
幾號令專一成功可必不可各徇己見互相執拗彼此
乖違致誤事機

一帝王之師貴在萬全無弊邊隅有警來則薄伐去則

勿追沉敵人在邊已久今草盛馬肥其鋒必銳而我軍趨之於數百里之外未免困乏宜令張忠養威持重凡出兵遇敵不可驟與之戰輕遏其鋒若見零散遊走之兵切勿輕易尋趣陣前佯敗之卒亦勿輕易追逐須要哨看的確審度事勢見可而進庶不墮其姦計倘或畏威遠遁地方不致受苦即係各官功績不必貪圖斬獲首級功次輕進遠追勞我師旅恐陷不測

一紫荆關等處兵部已奏行巡撫都御史臧鳳速來附

近地方駐劄與分守將官同心協力操練人馬其所管
達官達舍宜令支與口糧給領馬匹委官管領約束遇
警即便發去與守關官軍協力戰守仍行沿邊一帶分
守守備兵備防守等官各慎固邊關剗削山崖挑挖賺
坑嚴謹烽堠秣馬厲兵常如敵在目前一處有警即便
傳塘走報隣境官軍互相應援不可自分彼此推托誤
事

一山西鎮巡官宜令嚴督偏頭寧武等關分守守備等

官嚴加防禦恐敵不得利於東而窺我之西又蹈前年故轍以為山西腹裏之害

一延綏兵馬素為敵人所憚近聞副總兵安國所領奇兵游擊將軍朱鑾所領土兵大同俱已調來恐數少不敷應援宜作急將游擊杭雄所領遊兵星夜調來三枝會合當有七千餘人隨敵向往截殺勝於他處兵馬但此兵連年征調已極疲困宜令延綏巡撫官每員名賞銀一二兩以作其氣且大同宣府地方比之他鎮不同

仍宜令延綏總兵官王勛挑選戰鋒人馬三千員名前
來清水營駐劄若聲息十分緊急即便統領過河策應
若套內尚有餘黨卽調寧夏陝西兩鎮遊兵分布按伏
防守此皆先年已行故事

一用兵以賞罰為先今軍中止是斬獲首級者方得給
與銀牌數亦不多其論功行賞往復覈勘動經歲年夫
鋒刃之下與死為隣況常人之情見利則趨以速為貴
邊軍終歲勤苦日不聊生欲作其勇敢之氣必須以重

利激之合無令兵部於太僕寺馬價銀內再借支五萬兩作急差官齎送提督軍務官處分發宣府大同管糧郎中處收貯於內量支若干差委的當官領在軍前隨宜給賞有功官軍使之樂於用命事寧餘剩銀兩仍解送兵部轉發該寺交收

一大同宣府偏頭關等處土著軍民舍餘人等中間多有材力勇悍輕生善鬪之人若激之以利自能使之鼓舞用命勝於遠調客兵查得先年兵部題行宣大二鎮

事例該本部議稱各邊土人有能奮勇設策斬獲敵首一顆隨即賞銀三十兩願陞者給與冠帶名為義勇永免本身差徭若能糾習鄉丁截殺敵衆斬首至五顆以上為首者加陞署所鎮撫奪獲被擄牛羊等項以四分充賞等因題奉孝宗皇帝聖旨是便鋪馬齎文與各該巡撫官着好生省諭鄉村軍民人等果有設謀奮勇斬獲敵級的照例重加陞賞欽此欽遵通行外但原擬事寧停止不為常例今敵勢猖獗比前尤甚合無令兵部

查照前例通行宣府大同偏頭關等處三鎮揭示一
應人等知會有功照例施行蓋敵騎初入勢合而強官
軍既不敢輕與爭鋒及其分散搶掠軍馬猝難調集應
援若此策一行人人踊躍庶幾隨地寓兵敵人知懼不
敢恣肆正德十一年月日

議處代府疏

臣梁儲等謹題近日該司禮監官傳諭聖意以代府切
臨邊境天氣苦寒又將軍以下人等類多不法欲下廷

臣議擇他處空間府第遷代府居住臣等竊以為祖宗以來分封藩國規制已定不宜輕易遷改永樂初年雖有寧府自太寧遷江西遠府自廣寧遷湖廣之舉蓋其時百姓殷富府庫充實公私用度徵發不難況分封未久宮眷不多所居宮室亦易營辦一應事體比之今日大不相同臣等查得代府宗派十餘年前所生子已五百七十餘人女已三百餘人歲增一歲今益衆多若要遷居他處其親王郡王宮眷子女必須蓋造殿宇將軍

中尉儀賓親戚人等亦須給與居址房屋大約言之雖
得銀二三百萬餘兩尚恐不能濟事見今公私耗竭軍
民困憊不知此銀從何出辦且如弘治年間壽王自四
川保寧遷於湖廣當時宮眷亦多又只將見成宮室畧
加修飾居住然費用已是不貲民心已多嗟怨況今營
建乾清坤寧二宮大役方興百需未備若一旦又有此
舉民力決不能堪非惟逼迫逃亡抑恐激成他變伏望
皇上念國家大計利害不小特賜採納停止前議天下

生靈不勝至幸又該太監張淮等勘得代府潞城和川
二王府奉國將軍聰濯等違法事情刑部會多官覆奏
臣等已謹擬一票封進以為如此處治已足示戒宗藩
亦合在廷衆論之公尤望聖明詳察近該太監張淮等
勘問過代府奉國等將軍聰濯等違法事情刑部會官
議奏蒙發下臣等議擬隨已擬票并揭帖封進未能仰
合聖意仍欲再下廷臣從重議處臣等看得勘官所叅
多官所議惟聰濯聰澗二人罪過為甚義當處置遷徙

次則聽洎聰溫等其罪輕重不同亦當量加罰治至如
代王及潞城和川二王其過失只在不能鈐制宗室非
有別項奸惡今若不憑勘官及多官勘議事理輒慮本
府他日或有意外之虞一槩欲遷之他處如此處置自
代王以下心必不服天下臣民亦必以為朝廷所處欠
當各處王府聞之或有援引祖訓具疏來問在廷內外
臣僚何人作此奸謀立此議論仍守闕索取奸臣不知
朝廷何以應之此事干係不小是以臣等雖再蒙聖諭

仍不敢別有所擬伏望聖明裁察將所擬前票早賜批
出以釋羣疑不然竊慮欲除禍患反生禍患他日悔之
噬臍莫及臣等雖萬死亦不足以贖誤國之罪矣臣等
下情無任惶懼懇切之至

請罷中官鹽引等疏

臣梁儲等謹題為陳愚見以裨聖治事臣等竊見天下
賦稅歲入有常而國用日增無有限制雖年穀豐登尚
難支持一遇荒歉尤為可慮況今敵患未寧軍需糧草

在在缺乏太倉每歲解去各邊銀兩常不足以供一歲
官軍之費所賴以接濟者惟有鹽課一事可以備飛芻
走粟之用然往日開中引鹽如正德十年則開中正德
元年以前課額今數年以來各處運司該年正課俱以
開中盡絕凡有奏請開中者未免預先支給鹽法因此
大壞猝有邊警台募客商多不上納蓋因公差人員奏
討引目數多一時就要盡數支賣本等客商皆守支維
艱日漸貧困以至如此夫以太倉有限銀兩既不足以

給各邊軍馬之需而鹽課成法又日益廢壞無以接濟
急用萬一復報有重大聲息勢須多用糧草不知朝廷
將何以處之近該太監劉允差往烏思藏齎送番供等
物奏討長蘆運司見鹽一萬引兩淮運司見鹽六萬引
跟隨人役類多挾勢謀利或至各支一萬引乃夾帶至
八九萬引以此載鹽船隻填滿河道南北官民商旅舟
楫一切阻塞不容往來其所用拽船人夫二三千名威
勢逼迫役及婦人所過之處怨聲載道非惟有壞鹽法

抑恐激成他變臣等實切憂之夫朝廷之所以遣允齋
供以取佛徒者蓋欲崇尚其教也然彼佛氏之教本以
慈悲不殺憫念衆生為心今允等所過地方軍民供億
乃至於顛仆道途死亡相繼就使佛尚有靈聞此苦事
亦將感額不樂而不忍見矣如此而欲奉佛求福其可
得乎又況烏思藏乃西番化外之教其徒飲酒食肉不
知戒律亦佛氏之所耻言者聖明在上正宜申嚴禁戒
遠斥其人豈宜崇信供奉浪費國計以貽天下生民無

窮之害也哉再照陝西延綏甘肅等處連年災傷米穀
薄收人多饑饉加以去年敵騎便入搶掠又有回賊累
次作耗瘡痍之民尚未甦息地方十分艱苦錢糧十分
窘乏彼處官司計無所出見行奏乞賑濟方患無以應
之今該司禮監傳奉聖旨差御馬監太監張玉前去彼
處造辦應貢各樣土宜物件其合用錢糧茶品等項欲
令陝西鎮巡三司等官及甘肅地方官員計處交與張
玉置辦凡百大小事情悉聽張玉便宜處治所在大小

衙門毋得違阻令臣等備以此意撰寫勅書臣等躊躇
惶懼未敢仰承聖意緣前項地方既值兵荒貧窘民不
聊生前項措辦錢糧欲取之於官則庫藏匱乏欲取之
於民則閭里空虛其太監以下人員至彼之日所費又
復不貲為彼處官員者若欲撫恤軍民則恐以違詔致
罪若欲奉行詔旨則恐嚴刑峻法之下民窮盜起別生
意外之患此固為人臣子者皆宜為國深慮者也而況
忝居內閣義同休戚如臣等者乎又況甘肅切近土魯

番諸界設若內地盜起彼必乘機入為邊患地方安危
關係非小至於便宜處治惟統兵官員臨機濟務得以
行之尋常公幹豈可援引為例伏望皇上俯垂天聽亟
將劉允取回今後凡有奏討鹽引者一槩不與重念陝
西歲荒民貧錢糧無處出辦仍將張玉停止不差前項
勅書免令臣等撰擬地方生靈不勝幸甚臣等無任懇
切顙望之至謹題請旨正德十一年月日

鬱洲遺稿卷一

欽定四庫全書

鬱洲遺稿卷二

明 梁儲 撰

奏疏

勸止遊翫以重大祀疏

臣梁儲等謹題連日該司禮監太監蕭敬等於左順門
宣諭聖意欲於郊天之後暫往南海子遊翫臣等與同
五府六部都察院通政司大理寺錦衣衛六科十三道

等官衆口一詞皆謂朝廷至大至重之事莫有過於郊
祀之禮今祀禮未舉而先有意於遊獵則精誠已分矣
何以感格天心籲祈歆饗而望其錫福降祥於天下哉
況自祖宗列聖以來一百五十餘年皆未嘗有此舉動
今一旦忽然有之臣等乃不能極力諫阻以致皇上輕
改祖宗之舊章怠忽郊祀之大禮縱耳目之細娛忘宗
社之至計則臣等之罪大矣又況塵埃草野之中車馬
叢雜之際等威莫辨警蹕不嚴萬一可虞之事或有出

於意料之所不及者則臣等雖萬死亦不足以贖誤國
負君之罪矣以此不敢苟為阿順曲從皇上採納羣議
斷在不行則聖德益光而聖治益隆矣宗社生靈不勝
至幸臣等下情無任激切俟命之至謹題請旨正德十
二年正月初四日

作養人材疏

臣梁儲等謹題為作養人材事近該內閣題欲將正德
十二年進士照先事例會同吏部禮部考選庶吉士等

因奉聖旨是該衙門知道欽此欽遵於本年三月二十九日會同吏部左侍郎等於東閣前出題彌封考選得汪佃等三十四名俱各文理優長年歲相應堪以教養合照例改翰林院庶吉士與第一甲三名進士舒芬倫以訓崔桐俱於翰林院一同讀書進學令掌詹事府事禮部尚書兼翰林院學士毛紀詹事府少詹事兼翰林院學士顧清教習文章內閣仍按月考試以驗進益合用桌凳筆硯紙墨酒飯阜隸等項仍照例行各該衙門

給發緣係作養人材事理未敢擅便謹題請旨正德十二年三月三十日本年四月初一日奉聖旨

計開

汪佃江西弋陽縣人 余承勛四川清神縣人

黃易江西弋陽縣人 江暉浙江仁和縣人

王廷陳湖廣黃岡縣人 汪應軫浙江山陰縣人

劉世盛直隸趙州人 曹懷直隸無錫縣人

儲昱直隸上海縣人 葉貴章四川名山縣人

葉式浙江永嘉縣人 馬汝驥陝西綏德州人

汪思直隸婺源縣人 王三錫山東曹州人

史于光福建晉江縣人 陳沂南京太醫院人

鄺灝直隸任丘縣人 史道順天府涿州人

第三甲

劉穆山西臨汾縣人 楊士雲雲南太和縣人

張星廣西桂林中衛人 蕭與成廣東潮陽縣人

林時河南汝陽縣人 鄭自璧順天府大興縣人

劉世揚福建閩縣人

曹嘉河南扶溝縣人

閻閔山東臨清州人

季方山西振武衛人

湯推學江西安仁縣人

黎貫廣東從化縣人

席春四川遂寧縣人

王邦瑞河南宜陽縣人

許宗魯陝西咸寧縣人

修書籍疏

臣梁儲等謹題為修理書籍事照得內閣及東閣所藏書籍卷帙浩繁但歷歲既久殘缺頗多臣等已督令典

籍等官劉偉等逐一查對明白欲行禮部轉行福建書坊等處照依開去各書內所缺篇數印寫解京以憑委官修補今訪得聽選等項監生王岳諸華殷甫王瀚俱寫字端楷合無着吏部將王岳等四名并於監生及鑄印局習字人員內再考選四五員名開送前來供應書寫待書完之日仍奏請送部選用未敢擅便謹題請旨正德十二年四月二十四日奉聖旨是該衙門知道欽此

作養人材疏

臣梁儲等謹題為作養人材事照得翰林院庶吉士原有教書官二員內毛紀已奉欽依陞任內閣辦事訖所有教書員缺合當推補今推舉得禮部左侍郎石瑄原任翰林院檢討修撰累陞侍讀學士及南京祭酒以至今官學行老成堪教庶吉士合無令本官兼翰林院學士專管教書未敢擅便謹題請旨正德十二年六月十

一日

災傷求免疏

臣梁儲等謹題為自劾不職乞賜罷黜以弭災患事今
年四五月以後各處地方水患非常南京國家根本之
地陰雨連綿歷兩三月不止且又雨中雷擊神機營旗
杆鳳陽祖宗興王之地雨久而多水驟發臨淮天長五
河盱眙等縣軍民房屋牲畜穀麥盡被衝塌田野禾稼
淹沒無存老稚男婦溺死甚衆蘇松長鎮嘉湖等府財
賦所出之地四五十日內大雨如注夏麥秋稻盡皆淹

死淮揚等處又南北襟喉之地自儀真以北至於清河
遠近一壑茫無畔岸高低禾稼俱無形迹房屋倒塌人
畜漂溺難以數計淮安新舊城內駕船行走居民老小
半棲城上河隄決口阻壞船隻後幫糧運無計前行湖
廣荆襄慶霪雨連旬江水泛漲人民困苦不減去年至
若京城內外并順天河間真定保定等府連日驟雨數十
年來未嘗有通州張家灣一帶彌望皆水衝壞糧船漂
流皇木不知其幾且每年漕運糧米就使盡數運到通

京二倉尚慮不足供用今先到糧船既已沈溺數多後來糧船又未知何日可到況大同宣府三鎮每歲主客兵馬除草束之外該用糧餉大約共用一百五六十萬今欲查議足勾四五年糧草之用又未知設何方法作何處置乃可以充足前數又況山東登萊二府及遼東地方自春至夏雨澤少降二麥既缺秋稼未登前項各處地方水災旱災並在一時民將何以堪命竊恐民窮盜起勢所必至萬一或有如往年劉六劉七齊彥明輩

起而倡亂勢又不得不調兵征剿一欲調兵必先糧草
今既公私匱竭又將何以處之將來事勢誠有大可慮
者臣等輔導無狀實切憂慚輾轉以思不能緘默伏望
皇上念祖宗創業之艱難思今日保守之不易新德勤
政以回天意布澤施恩以安人心特勅有司將被災州
縣一應徵派盡行蠲免被災人戶量行賑卹更望皇上
特按前代異災策免大臣故事將臣等罷歸田里別求
經濟偉才代居重任則臣等今日雖難追夫瘝官曠職

之罪而他日猶幸免夫妨賢誤國之誅矣臣等不勝激切俟命之至謹具題知伏候勅旨正德十二年七月十八日

請回鑾疏一

臣梁儲等謹題臣等昨日在閣辦理文書見午本未散候至申刻始出閣門及至長安門外則道路相傳皆謂聖駕清晨已輕騎徑往教場隨去天壽山等處臣等聞之心膽戰驚莫知所措今儲嗣未建人心危疑車駕既

出誰與居守又各衙門一應題奏本并太常寺該奏大祀社稷并遣祭先師孔子此等禮儀尤為重大不知何以上達天聽臣等職叨輔導實不遑安謹詣行在俯伏面奏恭請聖駕即回以安人心臣等不勝恐懼待罪祈恩俟命之至正德十二年八月初二日

請回鑾疏二

臣梁儲等謹題近日聖駕遠出巡幸臣等先至沙河奏請還宮至今未蒙賜允臣等憂思迫切罔知攸措伏望

皇上念皇城之內居守無人機密事務不可往來傳奏
即日旋駕回京以上解兩宮太后之憂下副中外臣民
朝夕之望不勝幸甚臣等職居近禁輔導無狀先是不
能積誠諫正今又能力請回鑾罪該萬死尚當乞恩
罷黜以謝天下此情先具題知伏乞聖明鑒察正德十
二年八月初六日

請回鑾疏三

臣梁儲等謹題臣等伏見聖駕遠出巡幸本月初六日

早該司禮監太監蕭敬等於左順門傳諭聖意命文武百官不必迎駕一二日即回自初六至今已經三日恭候回鑾未有定期中外臣民不勝瞻戀臣等備員內閣義關休戚匡輔無能徒切慚畏伏望皇上俯納微忱即日回鑾以安衆心宗社幸甚生靈幸甚臣等不勝懇切仰望之至正德十二年八月初九日

請回鑾疏四

臣梁儲等謹題伏自今月初一日聖駕遠出巡幸跋涉

數百里經旬未返臣等雖職忝輔導不獲與扈從之列連日出郊迎請未睹聖顏下情懸懸曷勝瞻戀謹待罪俯伏上請伏望皇上思宗社之重寄念居守之無人上體兩宮太后倚望之深下憫中外臣民仰戴之切即日回鑾以慰人心天下幸甚臣等不勝懇切俟命之至正德十二年八月初十日

求免疏

臣梁儲等謹題為自劾不職久妨賢路乞賜罷黜以謝

天下事臣等本無才識誤蒙皇上簡置內閣累次陞授
官至一品顧平日碌碌曾無毫髮補報近日聖駕遠幸
近郊經旬不返臣等又不能直言極諫恭請回鑾以慰
中外臣民之望臣等負國之罪大矣伏望聖明裁斷即
將臣等所授官職盡行削去罷歸田里以為人臣不能
盡職之戒仍亟選賢能入閣辦事庶幾尚有格心之學
濟時之效如此則臣等雖終身疏食水飲亦且不朽矣
臣等下情不勝懇切願望之至為此具本親齎謹具奏

聞伏候勅旨正德十二年八月十三日

問安疏

臣梁儲等謹題為問安事伏見聖駕歸自近郊上有以解兩宮聖母之憂下有以慰中外臣民之望臣等不勝慶幸但自駕出以至鑾回經歷旬又三日跋涉二百餘里在臣下尚且不勝其勞況以萬乘之主躬御鞍馬朝暮寢膳豈能不減於舊伏望皇上自今以後慎重起居勿輕出入以益延國家億萬載無疆之福臣等不勝懇

切祈望之至謹具題知正德十二年八月十四日

請視朝疏

臣梁儲等謹題昨者皇上巡幸回鑾中外人心無不歡
慶臣等伏望皇上斟酌古禮特於奉先奉慈殿親行祭
告次詣兩宮謁見聖祖母聖母然後御門視朝使大小
臣工瞻拜天顏得以遂其依戀之誠臣等不勝幸甚謹
具題知正德十二年八月十四日

宗社大計疏一

臣梁儲等謹題為宗社大計事伏自聖駕謁陵之後中外臣民懸望回鑾莫不心懷憂懼寢食靡寧近日獲覩聖駕還宮視朝聽政又莫不歡忻鼓舞交相慰賀臣等見羣心如此已有不勝其慶幸者矣然尚有葵藿微誠未能上達謹為君父懇切言之蓋今前星未耀儲位尚虛上未有以慰兩宮聖母之心下未有以副百官萬民之望此天下之大事宗社之大計不可不早定而預處者也伏望皇上先白於兩宮聖母次召皇親公侯駙馬

伯并五府六部都察院通政司大理寺及翰林院詹事府六科十三道等官羣集於朝詔以大義俾於宗室中推舉近屬之相應者一人具奏上請然後皇上斷自聖心告於天地宗廟社稷迎取來京教養成就俾之間安侍膳司香內殿以待他日元子誕生然後出封藩服如此則恩至義盡言順事行人心悅而天意從矣國家萬萬年無疆之休實在於此臣等脩員輔導義同休戚事有關於安危大計者安敢不昧死言之伏望聖明俯垂

鑒納即賜施行天下幸甚宗社幸甚臣等下情不勝恐懼顙望俟命之至謹題請旨正德十二年八月十八日

修書籍疏

臣梁儲等謹題為修理書籍事照得翰林院原有習字秀才周一元章鳴鳳又該臣等題准取到監生王品等四名并吏部考送監生儒士劉高等五名俱各供應書寫所有月糧飯食并紙劄筆墨合無照依先年謄錄監生王琪等事例行移各該衙門支給應用未敢擅便謹

題請旨正德十二年八月十九日

誥勅官疏

臣梁儲等謹題為誥勅事照得在京在外文職官員應得誥命勅命該臣等通行掌管又有尚書兼學士李遜學專一管理但其間查對手本創寫草稿開具揭帖等項俱係翰林編修潘辰獨任其事本官先因大學士徐溥等具本奏保欽蒙除授本院待詔歷陞典籍籍博士以至今官其文學老成操履端慎既為輿論所推且能勤

於職業不少懈怠又為臣等素所委用但今年過七十
累疏求退未蒙俞允倘一旦得請而去後來繼之者或
非其人未免誤事臣等亦不能辭責今訪得尚寶司司
丞劉銳性質安靜學行動謹曾在制勅房辦事有勞無
過堪以繼理前事合無勅吏部將潘辰量擬陞秩以酬
其勞仍令照舊辦事并將劉銳改送內閣誥勅房與同
潘辰習學管理庶幾他日得人任用事無稽誤未敢擅
便謹題請旨正德十二年八月二十四日

宗社大計疏二

臣梁儲等謹題為乞賜聖斷早定宗社大計事臣等備
員內閣叨受寵恩尸位素餐萬無一報近以宗社大計
冒昧上請欲冀聖明俞允早賜施行庶上以慰兩宮聖
母之心下以副中外臣民之望顧恭俟旬日未奉明旨
蓋由臣等平日不能盡職以致不能少回天聽至於如
此負國之罪益又大矣然區區犬馬之忱終有不能自
已者用是再瀝丹衷仰祈聖明鑒納即日達於兩宮聖

母隨召左右心腹重臣示以臣等前後章奏與之密切
計議斷自聖心特於至親宗派中照依編序欽定年行
相應者一人差官迎取到京俾之司香內殿以待元子
誕生然後出封藩服如此則人神胥悅而宗社永安矣
臣等不勝忠誠懇切祈恩俟命之至謹題請旨正德十
二年八月二十六日

請迴鑾疏

臣梁儲等謹奏為恭請迴鑾以慰人心仍乞特賜罷黜

以光聖政事臣等數日以前聞之道路皆云聖駕將復
有出郊之行當時殊未之信昨日及今日進閣辦事俱
未見文書發下臣等始信所聞不妄竊見我皇祖憲宗
純皇帝皇考孝宗敬皇帝當時雖建有皇儲人心安靖
然猶思患預防不肯輕出遊獵今元子未生九重大內
無人居守一日萬幾誰與裁決中外臣民之心實皆驚
惶無地寢食不安況鞍馬之上勞苦百端雖天保聖躬
必無他患然意外之虞亦有不可不深加防慮者臣等

既忝職輔導安敢緘默不言伏望聖明鑒其愚悃即日
迴鑒永為羣生造福首將臣等削奪官職罷歸田里以
為輔導無狀者之戒別選賢才代居重任庶得盡忠啓
沃以裨聖德以光聖政則天下幸甚而臣等亦幸甚矣
臣等不勝忠懇激切祈恩俟命之至謹具奏聞伏候勅
旨正德十二年八月三十日

請迴鑒疏二

臣梁儲等謹題為恭請迴鑒以慰人心事前日聖駕還

宮之後京城內外官員軍民人等無不歡欣喜慶祝頌
聖德不意近日以來又有此出關巡幸之舉大小人心
比前尤加惶懼臣等及府部以下各衙門官員俱日詣
左順門跪進章疏伏請迴鑾但因未奉明旨以致一應
章疏俱無由上達況皇城都城無人居守每日護衛官
軍及辭見官員人等自朝至暮俱不敢輒自退出此事
關係不小臣等職居輔導與國家義同休戚不得不昧
死為皇上再三言之伏望聖明宥臣等之罪察臣等之

心俯垂天聽降旨處分俾各衙門官員人等皆得有所
遵守仍即日迴鑾視政以衍宗社萬萬年無疆之休臣
等不勝戰慄待罪俟天俟命之至謹具題知伏候勅旨
正德十二年九月初一日

請用人隨侍疏

臣梁儲等謹題為乞賜明旨以慰人心等事臣等竊見
乘輿在外夙夜勤勞内外文武百官皆當隨侍左右以
備使令今內閣并府部等衙門俱各開具堂上官姓名

上請伏乞於內各點一員隨侍以盡臣子之心臣等謹
并將所擬旨意揭帖封進伏乞一經聖覽御筆批下施
行庶使各知遵守人心賴以安慰謹題請旨正德十二
年九月初四日

請迴鑒疏三

臣梁儲等謹題本月初八日早該司禮監太監蕭敬等於
左順門傳諭聖旨云巡幸數日即迴着府部等衙門官
員各用心辦事欽此臣等聞之不勝喜慰然聖駕之出

今已旬日邊塞險危之地鞍馬跋涉之勞臣子之心不能不朝夕憂慮況今聖節在邇天下王府并文武衙門及外國四譯人員進表朝賀到京皆欲拜稽闕廷瞻仰天顏以遂其山呼祝頌之誠此尤為國家大禮不可廢闕伏望聖明留念早賜廻鑾以全盛典以安衆心臣等不勝至願謹題請旨正德十二年九月初九日

請廻鑾疏四

臣梁儲等謹題為再陳愚悃早乞廻鑾事伏自聖駕出

京以來已經二十餘日今恭遇萬壽聖節凡親而宗藩
遠而外國其奉表來京與臣等在京在外各衙門官員
人等皆不得一望天顏山呼舞蹈以盡其惓惓敬仰祝
頌之誠況孟冬伊邇禮當時享太廟若不及早迴鑾躬
親奠獻其何以慰祖宗在天之靈亦何以盡皇上報本
追遠之意又況近京各處衙門多抄奉總督軍務威武
大將軍總兵官印信鈞帖凡調遣軍馬支給錢糧槩以
此帖行之臣等伏見祖宗舊制一應軍馬錢糧非該部

奉有勅旨俱不許擅行支應今乃一旦以此行之他日設有奸人乘機詐冒軍衛有司不能辨別真偽一槩奉行安能保無他患伏望皇上思祖宗付託之重念兩宮懸望之深即日廻鑾以安中外今後凡欲調遣兵馬支給錢糧仍遵舊制而行前項印信鈐帖俱乞停止以防意外之虞且毋使天下之人他日指為口實以為臣等之罪宗社臣民不勝慶幸謹題請旨正德十二年九月二十日

議處國計併請廻鑒疏五

臣梁儲等謹題為議處國計事近該戶部節奉聖旨邊
兵寒苦着戶部上緊處置銀一百萬兩差委的當堂上
官一員管領親到該鎮交收以脩犒勞欽此臣等仰窺
聖心軫念邊士欲加犒賞以慰其勞是即天地覆育之
仁但今日事勢則有大有憂者蓋天下歲入錢糧自有
定數分毫不可增添一遇水旱災傷又當優恤蠲免難
以充足前數況朝廷經費日增月益無有紀極即今宣

大二鎮城堡糧草處處缺乏鎮巡等官節次奏討銀兩該部題准已差侍郎鄭宗仁前去整理但帶去銀兩不多隨買隨放旋復告乏今復奉有前旨不知該部又將何以計處臣等聞得太倉銀庫正收銀兩動支已盡其通年積下餘銀僅有十五萬兩該部見在折糧折草等銀亦止有二十萬兩又係見談給與在京軍官夏秋二季折俸之數今該部欲將前項銀兩暫借那用仍開生員納銀事例以冀暫應一時之命臣等竊見在京軍官

俸糧寡薄專一仰給此銀用度若過期不行給與身家
養贍不敷未免致生嗟怨是誠不可不慮及照生員納
銀事例本非美政先年或因緊急用兵及賑濟饑民不
得已偶一舉行近歲以來行之太頻以致人材冒濫選
法阻滯尤有傷於治體伏望聖明深惟宗社生靈至計
俯從臣等所言特勅該部將前二項所開銀三十五萬
兩以一半發與二鎮添充買草之用存留一半發與軍
官養贍免令解送以弭衆怨所擬生員納銀事例亦併

不行仍乞早廻聖駕以安天下之心以防意外之變臣等惓惓愚衷不勝懇切瞻戀俟命之至謹題請旨正德十二年九月二十八日

宗社大計併請廻鑾疏六

臣梁儲等謹題為宗社大計事伏自聖駕巡邊至今已三十餘日臣等三人義應輪流一人常詣行在左右朝夕奉問起居因得少伸啓沃為因居庸關把守人員奉有旨意不容官員人等往來是以臣等不能如願至於

邊警重務亦一切不得與聞臣等輔導無狀致令皇上
待之疏薄如此罪已不容於自逭矣二三日來始傳聞
駕在順聖城內駐蹕又聞敵人擁衆去陽和邊外不遠
且分營深入搶掠即今京城內外人心搖搖臣等下情
尤不勝憂懼之至竊料北敵之計難測且覘知聖駕在
外日久月深彼將陸續而來聚衆甚多却乃藏形匿影
外示寡弱使我易而無備是誠不可忽畧尤宜周防遠
慮者也乞勅隨駕官軍持重堅守切不可輕出接戰及

貪功逐利以致墮彼計中仍勅各該游擊將官分布要害去處隨宜分合相機戰守彼雖出境遠去亦宜哨探的確方可整衆星夜迴鑾如此則計出萬全保無他患天下臣民皆知稱頌睿謀神算實有出於尋常萬萬者矣此乃宗社安危之機天下治亂之本伏惟聖明深加之意謹題請旨正德十二年十月初三日

請迴鑾疏七

臣梁儲等謹題為懇請迴鑾以安人心事近日大同地

方被敵人擁衆深入直至應州等處搶剽伏蒙皇上獨
運神謀分遣將士追襲勦殺擒斬數多敵衆畏威遁出
境外臣等始雖憂懼既而不勝喜慰意以為邊患既寧
迴鑒有日不惟使百官萬民即得以遂其瞻天仰聖之
心而隨行將士亦得以遂其振旅還家之願此誠皇上
之盛德宗社之洪庥兩宮太后之大慶也今禮部具本
奏請欲考求先朝故事舉行迎駕及朝賀之禮緣司禮
監朱經齋奏未曾奉有旨意以此未敢擅行擬進伏望

皇上速示回期仍降明旨令該部遵奉議擬具奏定奪
庶臨時不致違悞至於各衙門近日題奏一應文書今
次經司禮監面奏者亦乞照依擬票發下毋令壅滯如
或遇有緊急軍情應用軍馬糧草等項尤乞特勅各部
即時查議處置許其徑自差人馳奏行在庶不有悞事
機臣等忝職輔導不稱任使有所見聞不敢隱默謹具
題知伏候勅旨正德十二年十月二十四日

請迴鑾疏八

臣梁儲等謹題為速請迴鑒看牲以成大禮事今日早該司禮監太監蕭敬等於左順門傳奉聖旨今特差太監張永魏彬張忠趙林齎帖傳與司禮監太監蕭敬等知道即今尚有邊報未寧目下不得便行所有閏十二月初一日起照舊差官輪流看牲不誤大祀天地爾各衙門大小官員各要安心辦事該衙門知道欽此臣等竊惟人君之道莫大於敬天敬天之禮莫大於郊祀是以我祖宗列聖百五十餘年以來每遇郊祀必於前一

月躬往看牲歲之首月卜日行禮所以天心克享而天下久安仰惟皇上為天之子受祖宗列聖之天下果然上體祖宗列聖之心以事天則天之眷我皇上亦將無異於祖宗列聖之時矣今駐蹕關外久未廻鑾顧謂邊報未寧便欲差官先行輪看臣等愚昧心竊未安況邊報縱有未寧自有各該鎮巡等官分任其責皇上但當專其委任明信賞罰則邊境自爾無虞豈可以是為詞遂欲廢此百五十餘年盛典萬一天下臣民及各處宗

藩有疑於此而具奏問故則將何說以應之此事係國
安危利害不小伏望皇上俯從臣等所言收回新命即
日廻鑾躬往南郊看牲以成大禮則人心安而天意悅
宗社萬萬年無疆之慶端在是矣臣等不勝懇切俟命
之至正德十二年十二月二十二日

勸止巡幸併求免疏

臣梁儲等謹題臣等竊見旬日以來風霾大作日色無
光道路相傳又云聖駕將有巡狩之舉中外臣民莫不

心懷憂畏此皆臣等康濟無能輔導無狀之所致也今
科道官伏闕陳奏乃其一念忠誠所發伏望皇上俯從
其言以安人心以回天意仍將臣等即賜罷黜以謝天
下別選賢能之臣光輔聖政用收桑榆之效則臣等感
恩戴德益深益厚終身飯蔬飲水亦無復有遺憾者矣
臣等下情不勝瞻天仰聖懇切祈望之至正德十四年
三月十四日


辭免恩命疏

臣梁儲謹奏為辭免恩命事臣於正德十四年七月初八日九年考滿該吏部具題節該奉聖旨大學士梁儲今已一品九年考滿寫勅獎諭加特進兼支大學士俸照舊辦事還與誥命賜宴禮部欽此臣聞命兢惕罔知攸措伏念臣起自遠方才識寡陋平日仕宦雖稍希前輩長者之風然氣稟所拘實深乏濟時適用之器伏蒙皇上篤念春宮舊臣自正德元年以來九轉臣官以至今職中間駢蕃之賞賚廕叙之恩榮尤有不一而足者

臣捫心揣已輾轉思惟有何功德而受恩至此茲當九年考滿之際正擬推讓賢能力求休致庶上不累聖主知人之明下以全臣子知止之義顧值時方多事未敢遽言已私姑欲更俟旬日方可決陳前懇豈意今日乃復蒙此殊常恩典此臣之所以捫心揣已尤不敢循例祇受者也臣之此情實出肺腑伏望皇上體臣微誠恕臣罪戾凡諸恩典俱容臣一切辭免姑令臣暫且照舊辦事候日下時事頗寧即許臣力辭求退則臣之受恩

愈益深重矣為此具本親齋謹具奏聞伏候勅旨正德

十四年七月日



鬱洲遺稿卷二